

111 年全國語文競賽客家語朗讀文章國小學生組（四縣腔）

編號 1 號

### 【生趣个童年】黃美貞原作

還細時節，細人仔無電子產品做得搞；毋過，屋簷下、杌仔樹下、伯公下、大圳溝該、竹林肚，做下都係佢兜个遊樂園。

佢兜四姊妹，還過鄰舍个細人伴仔，輒常湊等份家啦飯仔、搞紙擲仔<sup>1</sup>、搞園人尋等等，係堵著毋使讀書个下晝頭，定著愛搞到斷烏，等到大人擎等竹修仔來尋細人仔，大家看著毋修勢<sup>2</sup>吔，正逼瀉。

好天好時，佢兜乜好在圳溝肚覓蜆仔。有一擺，沙鼻个老弟喋喋滾，同大家打賭講佢捉得著細蝦公仔，上屋个阿賢好擲擲仔應：「該愛仰般賭？」老弟誚難佢：「你係捉到比佢較多，暗晡夜佢就請你食夜。」阿賢堪毋得人翁<sup>3</sup>，應講：「好，無問題！」該下晝，佢兜先攔水窟，想摻蝦公錫到水窟肚，毋過，細蝦公仔哪有恁該捉，兩下半仔蝦公就躍走哩，佢兜試著無意思，早就走淨淨。無想著佢兩儕定著愛比到有輸贏，目珠眨都毋眨，搵到一

身溶潦、扃扃糟糟合泥了了，水窟肚就單淨攔著兩三尾細魚仔定定，等到暗摸胥疏吔，佢兜正無結無煞、遽遽轉屋。管佢麼人輸贏！係還毋轉屋，毋單淨無飯好食，皮還愛弓緼啊正做得咧！

還有一擺，下晝頭當翕熱，佢兜恁多姊妹在屋側角搞園人尋。老弟係搞頭王，滿哪仔都尋得著來園，搞幾下輪都搞毋得煞棚。無想著，坐在屋簷下个阿婆大聲喊講：「遽遽轉來啊！莫在該頭牛眼樹下搞，該位盡多草鞋搭<sup>4</sup>哦！」頭擺个細人仔輒常打赤腳搞到毋知頭天，樂線樂線个佢兜，無摻阿婆个話聽入耳。結果，做鬼捉人个老妹忽然間看著該生到烏疏疏、有十過公分長个弄毛蟲，對等佢趨過來，佢嚇到尾瀉屎、走都走毋掣，嘎「哇！」聲仔嗽出來！嶄然好搞个老弟，興蹀蹀仔行兼想愛逐該尾草鞋搭，阿婆閱悴悴仔咄講：「你係昇趨到圓身項，該就貓拋糞耙啊——難敲爪哦！」

「良言莫嫌少，朋友莫嫌多。」還細時節，跔等同學伴仔、鄰舍个細人伴仔弛崗打陣共下搞，滿哪仔都係佢兜共下行過个腳跡、看過个景色、搞過个生趣事，乜係佢兜盡懷念个童年。該兜生趣个回憶摻畫面，永久都會留在吾个腦膈肚。

<sup>1</sup> 紙擲仔：音 zii` biag e`；紙牌，指孩童時期玩的圓形紙牌，圖案多為卡通人物或電視、電影劇中人物。

<sup>2</sup> 毋修勢：音 m` cam se；形勢不好、情況對自己不利。

<sup>3</sup> 翁：音 hib`；此指以言語威嚇或挑釁。

<sup>4</sup> 草鞋搭：音 co` hai` dab；大灰枯葉蛾的幼蟲。

編號 2 號

【一場有意義個活動】林惠美原作

學校附近仔有一間安養中心，有一擺，佢兜摺學校參詳想愛安排老人家來學校「行」祭，學校當決截個應下來；為著這擺個活動，學校同兩個班級參詳主導、進行大部分個活動。學校先生認為佢兜個班級盡分人倚恃得得<sup>1</sup>，故所就摺事先訪問、煮食、招待個活動分佢兜負責。

訪問單裡肚有七個問題，係愛了解老人家好食麼个？想愛做麼个？學校按算參考這兜訊息，來設計活動個過程摺準備个東西。先生無希望佢兜拿等單仔做紀錄，故所喊大家先摺問題記起來，還過先安排佢兜「摺愛送入安養中心」个行程：飼忒點心，佢輕輕仔摺阿伯婆搥背囊，緊搥緊摺佢打嘴鼓。佢問：「阿伯婆，你盡想愛做麼个？」佢頭磬磬仔應講：「佢想愛轉屋下。」一陣酸痛个心緒衝<sup>2</sup>上吾个心肝頭、吾目汁忍等毋敢分佢跌出來，行出大門，目汁順等吾个面頰卵跌一路下……。

阿伯公、阿伯婆來哩啲！一組同學搥佢兜遠學校，逐個位所

都有「小小解說員」同佢兜做紹介，趕這時節，佢兜煞煞摺在學校个菜園摘轉來个菜擇擇啊、洗淨來；先生吩咐切菜个同學愛切到幼幼仔，較硬个莖無愛佢。大家擇菜个擇菜、切菜个切菜、起火个起火，分工合作，兩下半就同老人家个點心準備好哩！佢兜同老人家个輪椅搥到安排好个位仔，緊飼老人家食點心，緊聽社服人員同佢兜講个話，先生感覺著氣氛有兜仔冷落，就行去頭前……。

「大哥、大姊，還記得佢無？有想佢無？」先生開容笑面个問，老人家黏時面就開陽起來，緊應：「有哦！有哦！」先生摺佢兜謔哆、講笑，過後，先生个面相有較嚴肅个同佢兜講：「其實，你兜个世細乜已有孝，顧慮著屋下無人好守顧你兜，驚你兜跌倒、愁你兜無伴，自家又愛賺著來食，無奈何正會送你兜來安養院。大家有緣分共下就愛珍惜，答應老妹，對今晡日開始，逐日都快樂个過日仔好無？」有人緊領頭；有人大聲个應好；有人流等目汁領頭。看著阿伯婆流目汁，吾心肝又痛起來咧。

活動過後，佢深深个了解著老人家心肝肚个孤栖，佢想：今過佢定著愛好好个照顧屋下个阿公、阿婆，有孝佢兜，毋會過同佢兜應嘴應鼻哩！

<sup>1</sup> 倚恃得得：音 i` sii e` ded`；值得信任依賴。

<sup>2</sup> 衝：音 cung；此指(酸楚)往上冒。